

明

史

明史卷十六

本紀十六

世宗上

世宗諱厚熹憲宗孫也父曰興王祐杭爲孝宗次弟以弘治七年九月之國安陸正德十四年六月薨諡曰獻時帝年十有三以世子理國事十六年三月丙寅武宗崩無子慈壽皇太后與大學士楊廷和定策使太監谷大用大學士梁儲定國公徐光祚駙馬都尉崔元禮部尚書毛澄等以遺詔迎帝入繼大統夏四月癸未帝發興邸癸卯至京師閣臣請如禮部所定儀擇日正位帝不許遂以是日即皇帝位大赦天

下以明年爲嘉靖元年賜天下田賦之半自正德十五年以前逋賦悉免之丙午遣使迎母與王妃蔣氏于安陸召致仕大學士費宏入閣戊申命禮臣集議與獻王封號戶部尚書楊澤兵部尚書王憲工部尚書李鏊左都御史陳金王璟罷己酉下吏部尚書王瓊于獄五月乙卯詔閑大理銀礦丙辰梁儲致仕禮部尚書掌詹事府石琚爲吏部尚書壬戌吏部左侍郎袁宗臯爲禮部尚書兼文淵閣大學士入閣預機務甲子起孫交爲戶部尚書彭澤兵部尚書林俊工部尚書丙寅策試天下貢士賜楊惟聰等三百三十

入進士及第出身有差壬申錢寧伏誅六月戊子江彬伏誅己丑賑宣府大同饑乙未縱內苑禽獸禁天下毋得進獻丁酉革錦衣衛冒濫軍校三萬一千八百二十八人戊戌賑江西災辛丑南京刑部尚書金獻民爲左都御史壬寅革傳陞官癸卯賑遼東饑己酉停陝西織造裁服秋七月壬子進士張璉請立興獻王廟于京師推尊王及王妃正父母之號命所司集議癸丑命自今親喪不得奪情著爲令丙辰小王子寇莊浪指揮劉爵禦却之乙丑張綸致仕辛未石琚仍掌詹事府召南京兵部尚書喬宇爲吏部尚書

丙子革錦衣等衛及監局寺廠司庫旗校凡十四萬
八千七百七十一人九月乙卯袁宗臯卒庚午葬武
宗皇帝于康陵是月免山東山西災賦冬十月己卯
朔追尊父興獻王爲興獻帝尊祖母憲宗貴妃邵氏
爲皇太后母興王妃爲興獻后壬午興獻后至京師
十一月庚戌賑江西災戊午賑淮徐災丁卯賑大同
饑癸酉張璁進大禮或問甲戌罷廣西貢香丙子免
大同災賦

嘉靖元年春正月己巳甘州兵亂殺巡撫都御史許
銘二月己卯耕籍田己丑免開封及汝災糧三月辛

亥弗提衛獻生豹却之甲寅幸太學釋奠于先師孔子丁巳上慈壽皇太后尊號曰昭聖慈壽皇太后武宗皇后尊號曰莊肅皇后戊午上皇太后尊號曰壽安皇太后興獻后尊號曰興國太后夏四月庚辰林俊爲刑部尚書乙酉巡撫鳳陽左副都御史陶琰爲工部尚書壬辰命各邊巡按御史三年一閱軍馬器械五月辛亥賑洮岷被寇者仍免其稅糧六月免徽州及代榆社和順災賦秋七月丙午免江西去年災賦己酉以南畿浙江江西湖廣四川旱命撫按官講求荒政八月丙子再免江西災賦九月辛亥免馬邑

廣靈災賦辛未立皇后陳氏冬十月辛卯賑應天湖
廣江西廣西災仍免其稅糧丙申免應災賦十一月
庚申壽安皇太后崩戊辰免廬州鳳陽淮安揚州及
滁和災賦己巳改陶琰爲南京兵部尚書十二月癸
酉朔賑湖州水災乙亥工部左侍郎趙璜爲尚書戊
寅發太倉銀賑陝西山東被寇者壬午禱雪時盜起
山東轉掠河南至于南畿命巡撫鳳陽右都御史俞
諫提督軍務討之

二年春正月丁卯沙河堡被寇總兵官杭雄戰却之
二月癸未賑遼東旱災壬辰河南山東賊平丙申葬

孝惠太后于茂陵卒丑~~壬子~~致仕三月壬子召致仕
南京吏部尚書羅欽順爲禮部尚書辭不至乙卯策
試天下貢士賜姚萊等四百十人進士及第出身有
差是月俺答寇大同夏四月癸巳命兩京三品以上
及撫按官各舉堪任守令者乙未始用八佾于興獻
帝廟閏四月壬戌免真定災稅五月庚午朔寇犯密
雲癸巳免順德災賦是月亦卜剌寇甘涼六月癸丑
以災傷免天下稅糧之半秋七月戊子吏部左侍郎
汪俊爲禮部尚書庚寅免濟南諸府災賦林俊致仕
八月己亥金獻民爲刑部尚書乙巳命總督漕運右

都御史俞諫回掌院事辛酉寇犯遼東是月免順天
諸府及河南山西災賦九月癸酉命南京戶部右侍
郎吳廷舉賑徽州寧國池州太平安慶饑戊寅賑遼
東災冬十月辛亥孫交致仕己未彭澤致仕十一月
丁卯朔南京兵部尚書秦金爲戶部尚書壬申金獻
民爲兵部尚書壬午南京刑部尚書趙鑑爲刑部尚
書己丑賑河南災甲午命南京兵部右侍郎席書賑
江北州縣災是冬免兩畿及山東河南四川災賦
三年春正月乙酉免嘉興災賦丙戌南刑部主事桂
萼請改稱孝宗皇伯考遂稟獻帝興國太后父母之

號詔禮臣集議是月朶顏人寇二月丙午楊廷和致仕戊申召席書桂萼霍韜張璁于南京辛酉賑湖廣饑是月免蘇州松江常州鎮江及吉安武昌諸府災賦三月庚午兩廣賊平丁丑名興獻帝陵曰顯陵辛巳賑河南饑丙戌汪俊罷以席書代之夏四月丙申廣東新寧恩平賊平己酉上昭聖皇太后尊號曰昭聖康惠慈壽皇太后庚戌上興國太后尊號曰本生聖母章聖皇太后癸丑追尊興獻帝爲本生皇考恭穆獻皇帝大赦天下己未魯迷國貢獅子犀牛辛酉下編修鄒守益于錦衣獄五月乙丑朔蔣冕致仕下

修撰呂柟于錦衣獄壬申以奉先殿西室爲觀德殿
奉安獻皇帝神主丁丑遣使迎獻皇帝神主于安陸
己卯吏部尚書石琚兼文淵閣大學士入閣預機務
六月甲午朔南京刑部尚書邊憲爲左都御史辛亥
御史段續陳相請正席書桂萼等之罪吏部員外郎
薛蕙上爲人後解辨戊午鴻臚寺少卿胡侍奏辨張
璉等議禮之失並下獄是月免順天保定及應天太
平災賦秋七月己巳喬宇致仕乙亥詔去章聖皇太
后本生二字丁丑翰林院學士豐熙給事中張翀御
史余翱吏部郎中余寬員外郎馬理等一百三十四

人伏闕固爭之並下錦衣獄己卯上章聖皇太后尊號曰章聖慈仁皇太后癸未杖馬理等于廷死者十有六人甲申奉安獻皇帝神主于觀德殿己丑毛紀致仕辛卯杖修撰楊慎檢討王元正給事中劉濟御史王時柯等于廷有死者是月免南畿及河南災稅八月癸巳朔大同兵亂殺巡撫都御史張文錦乙卯吏部左侍郎賈詠爲禮部尚書兼文淵閣大學士入閣預機務南京吏部尚書楊旦爲吏部尚書是月免順天及濟南大同災稅九月丙寅用席書張璉桂萼方獻夫議更定大禮稱孝宗爲皇伯考昭聖皇太后

爲皇伯母獻皇帝爲皇考章聖皇太后爲聖母祭告
天地宗廟社稷詔諭天下甲申發帑金于宣大和羅
丙戌土魯番速壇滿速兒寇肅州命金獻民總制軍
務署都督僉事杭雄充總兵官往禦之冬十月壬寅
楊旦罷甲寅起故南京兵部尚書廖紀代之邊憲卒
以總督漕運右都御史李鉞代之十一月癸亥免開
封諸府災賦己卯命戶部左侍郎胡瓚提督宣大軍
務都督魯綱充總兵官討大同叛卒十二月癸巳遼
東被寇都指揮閻振敗之丁未金獻民遣將敗寇于
甘涼起致仕大學士楊一清爲兵部尚書總制陝西

三邊軍務

四年春正月丙寅寇犯甘肅總兵官姜奭擊敗之甲申命金獻民還理部事二月免蘇州松江及河間保定災賦三月甲戌勅修獻皇帝實錄夏五月庚辰作世廟以祀皇考六月丁酉金獻民致仕戊申免山東災賦庚戌李鉞爲兵部尚書丙辰南京吏部尚書顏順壽爲左都御史秋七月免開封災賦八月戊子朔作仁壽宮甲寅免順天諸府災賦九月免鳳陽諸府及南昌災賦冬十月丁亥作玉德殿景福安喜二宮十二月辛丑大禮集議成頒示中外是冬免順天河

間及南畿浙江山東四川災賦

五年春正月丙午遣中官建真人張彥頤第二月甲寅朔以龍虎山道士邵元節爲真人壬申賑順天保定河間饑庚辰免山西災賦三月戊戌策試天下貢士賜龔用卿等三百人進士及第出身有差丁未定有司久任法夏四月乙丑琉球官生蔡廷美等請就學國子監許之庚午寇犯大同宣府五月庚子楊一清爲吏部尚書兼武英殿大學士入閣預機務辛丑趙鑑致仕庚戌顏頤壽爲刑部尚書六月丁巳南京刑部尚書聶賢爲左都御史秋七月癸未獻皇帝寶

錄成庚寅免成都諸州縣災賦八月丙寅賑湖廣畿
是月免應天諸府及潼川儀隴諸州縣災賦九月戊
子賑徐及豐沛水災辛卯奉安恭穆獻皇帝神主于
世廟乙未李鉞致仕免真定河間災賦己亥章聖皇
太后有事于世廟冬十月辛亥朔親享世廟自是時
祭亦如太廟禮己未兵部左侍郎王時中爲尚書庚
午頒御製敬一箴于國子監及天下儒學是冬免南
畿浙江山東山西湖廣四川災賦

六年春正月癸未命四品以上及科道官各陳民間

利病丁亥命工部右侍郎蔣驥督採大木庚子勅修
明倫大典二月壬子席書有疾加武英殿大學士致
仕癸亥費宏石琯致仕庚午召致仕大學士謝遷入
閣是月免福建廣東廣西災賦三月庚辰寇犯宣府
甲午禮部右侍郎翟鑾爲吏部左侍郎兼翰林院學
士入閣預機務己亥秦金趙璜罷夏四月丙辰南京
戶部尚書鄒文盛爲戶部尚書工部左侍郎童瑞爲
尚書己未命工部右侍郎黃衷督採大木甲戌廖紀
致仕五月甲申召羅欽順爲吏部尚書辭不至丁亥
起故兵部尚書王守仁總制兩廣及江西湖廣軍務
討田州反者丙申禮部尚書掌詹事府吳一鵬回部

管事戊戌免涿諸州縣災賦己亥寇犯神木堡松萌
巖六月戊辰聶賢罷是月免畿南及臨洮鞏昌災賦
七月辛巳南京工部尚書胡世寧爲左都御史癸卯
命顯陵祀典視鳳陽皇陵八月庚戌下刑部尚書顏
順壽左都御史聶賢大理寺卿潘沐等于錦衣獄命
禮部右侍郎桂萼署刑部兵部左侍郎張璁署都察
院少詹事方獻夫署大理寺雜治之寇入河套總制
尚書王憲總兵官鄭卿等擊敗之癸亥賈詠致仕乙
丑南京刑部尚書李承勛爲吏部尚書庚午賑湖廣

水災九月壬午刊欽明大獄錄頒示中外丁亥改吳
一鵬爲南京吏部尚書己丑胡世寧爲刑部尚書丙
申吏部左侍郎桂萼爲禮部尚書是月免順天永平
鳳陽淮安及山東山西河南江西災賦冬十月戊申
兵部左侍郎張璉爲禮部尚書兼文淵閣大學士入
閣預機務復以胡世寧爲左都御史癸亥改李承勛
于刑部是月免湖廣及慶陽災賦十一月乙亥朔濬
天津海口新河丁丑桂萼爲吏部尚書戊子吏部左
侍郎方獻夫爲禮部尚書是月免浙江山東災賦十
二月丁卯李承勛爲兵部尚書提督團營胡世寧爲
刑部尚書兵部左侍郎伍文定爲右都御史

七年春正月癸未考覈天下巡撫官癸己免平涼災賦二月丁未免寧波災賦三月戊寅謝遷致仕甲申楊一清等以河清請率百官稱賀許之癸己命伍文定爲兵部尚書提督軍務梁材爲戶部左侍郎督理糧儲會兵討雲南反者丁酉寇犯山西夏四月甲寅以甘露降告于郊廟六月辛丑朔明倫大典成宣付史館刊布天下楊一清張璁翟鑾桂萼方獻夫等劾廢有差癸卯定議禮諸臣罪追削楊廷和等籍乙己濬通惠河丁卯免河間諸府災賦秋七月己卯追尊孝惠皇太后爲太皇太后恭穆獻皇帝爲恭睿淵仁

寬穆純聖獻皇帝庚辰刑部左侍郎劉麟爲工部尚書辛巳尊章聖皇太后爲章聖慈仁皇太后戊子詔告天下加恩中外八月壬子免河南災賦九月甲戌王守仁討廣西諸寨賊悉平之壬午賑杭州嘉興湖州災冬十月丁未皇后崩閏十月己丑王時中罷十一月丙午胡世寧爲兵部尚書庚戌賑寧夏災丙辰南京刑部尚書高友璣爲刑部尚書癸亥賑陝饑丙寅立順妃張氏爲皇后是月免順天及開封寧夏災賦十二月丙子寇犯大同辛巳鄒文盛致仕戊子梁材爲戶部尚書

八年春正月己亥賑山西旱災以三邊軍餉不充開
武官納銀例乙丑胡世寧致仕二月癸酉吏部尚書
桂萼兼武英殿大學士入閣預機務李承勛回部管
事召伍文定提督團營己而罷之丁丑賑襄陽饑戊
寅右副都御史熊浹爲右都御史三月丙申朔葬悼
靈皇后方獻夫爲吏部尚書戊戌賑河南饑乙己禮
部左侍郎李時爲尚書庚戌策試天下貢士賜羅洪
先等三百二十三人進士及第出身有差夏四月癸
酉李承勛兼提督團營軍務丁亥高友璣罷五月甲
辰南京刑部尚書周倫爲刑部尚書乙卯免順天諸

府災賦六月免南畿山東山西災稅秋七月甲午朔
熊浹罷丁酉劉麟致仕是月免臨洮鞏昌大同災賦
八月乙丑南京兵部尚書王憲爲左都御史庚午南
京工部尚書章拯爲工部尚書丙子張璫桂萼罷九
月癸巳朔召張璫還乙巳改周倫于南京以刑部左
侍郎許讚代之癸丑楊一清罷甲寅賑江西災是月
免應天及河間諸府災賦冬十一月庚子召桂萼還
巡撫四川都御史唐鳳儀獻瑞麥甲辰賑杭州諸府
水災戊申禱雪是日雪丁巳親詣郊壇告謝百官稱
賀十二月辛未王憲罷丁丑定百官朝祭服圖式庚

辰刑部右侍郎汪鉉爲右都御史乙酉賑真定饑丁
亥賑榆林饑是月免兩畿山東山西河南陝西浙江
江西災賦

九年春正月丙午初作先蠶壇于北郊甲寅賑寧夏
災丁巳賑山西饑庚申免真定諸府災賦二月甲子
更定社稷壇配位丁丑命巡城巡按御史檢察官民
服舍器用之踰制者免順天永平及浙江災賦三月
癸丑賑真定饑乙卯賑延綏饑丁巳皇后親蠶于北
郊夏四月乙丑賑榆林饑五月壬寅更建四郊六月
丙寅河南巡撫徐讚獻瑞麥羣臣表賀秋八月壬午

免江西災賦九月壬辰罷雲南鎮守中官乙未免應
天諸府災糧戊申以皇太后御製女訓頒示中外乙
卯方獻夫致仕冬十一月辛丑更定先聖廟祀典壬
寅章拯罷己酉祀昊天上帝于南郊禮成大赦天下
十二月丁巳朔免湖廣災賦工部左侍郎蔣珪爲尚
書己卯甘露降顯陵

十年春正月庚寅申明三途並用法辛卯始行祈穀
禮于大祀殿奉太祖太宗配甲午更定廟祀奉德祖
于祧廟乙巳桂萼病免二月甲子以甘露降告太廟
甲戌免廬州鳳陽淮安揚州災糧庚辰始祀朝日壇

三月己丑李承勛卒丙申寇犯甘肅丁酉寇犯大同
戊申罷四川分守中官夏四月丁巳皇后親蠶于西
苑壬戌召王時中爲兵部尚書甲子始禘于太廟五
月壬子始祀皇地祇于方澤閏六月己丑罷浙江湖
廣福建兩廣及獨石萬全永寧鎮守中官甲午免淮
安平陽諸府災賦秋七月癸丑命戶部侍郎葉相賑
陝西饑戊午免順天災稅張孚敬罷辛酉召方獻夫
爲吏部尚書甲戌賑保定災辛巳鄭王厚烷獻白鵲
詔薦之宗廟獻之兩宮傳示百官八月癸未始祀夕
月壇甲辰總制尚書王瓊獻甘露是月免淮安揚州

太原臨洮諸府災賦九月癸丑梁材憂去以許讚代之乙丑西苑宮殿成宴羣臣以落之丙寅李時兼文淵閣大學士入閣預機務戊辰禮部左侍郎夏言爲尚書壬申幸西苑御無逸殿命李時翟鑾坐講詩書宴儒臣于幽風亭甲戌改王時中于刑部庚辰召王瓊爲吏部尚書冬十月乙酉寇犯大同十一月甲子召王憲爲兵部尚書戊辰免西安災糧癸酉建祈嗣醮于欽安殿以夏言充祈嗣醮壇監禮使丁丑復召張孚敬入閣十二月戊子下御史劾希禮石金于錦衣獄壬辰寇犯應州是月免應天諸府及浙江河南

陝西災賦

十一年春正月辛亥賑順天保定河間饑己巳免重
慶諸府災賦辛未始祈穀于園丘己卯始于顯靈宮
建醮祝釐二月丙戌湖廣巡撫凌相進嘉禾詔薦之
太廟庚寅賑大同饑戊戌免湖廣災賦三月癸亥寇
犯延綏甲子策試天下貢士賜林大欽等三百二十
人進士及第出身有差夏四月辛卯詔封開國功臣
常遇春李文忠鄧愈湯和後裔爲侯五月丙子方獻
夫兼武英殿大學士入閣預機務六月壬午免順天
諸府災賦秋七月戊辰免應天太平災稅王瓊卒方

獻夫攝吏部事八月辛丑張孚敬罷九月庚戌汪鉉
爲吏部尚書丁巳賑陝西饑壬戌起聶賢爲工部尚
書丁卯免廬州鳳陽淮安揚州滁和徐災賦冬十月
丙申聶賢爲左都御史癸卯賑山丹莊浪饑十一月
甲寅四川巡撫宋滄獻白兔羣臣表賀戊午召秦金
爲工部尚書十二月乙亥賑山西饑是冬免兩畿山
東山西河南江西災賦

十二年春正月甲辰朔以左副都御史王應鵬奏疏
失書職名下錦衣獄都給事中魏良弼論救並逮治
之丙午河南巡撫吳山獻白鹿告廟受賀丙辰復召

張孚敬入閣是月免浙江河南災賦二月乙酉賑雲
南饑癸卯王時中罷三月甲寅寇犯宣府丙辰幸太
學釋奠于先師孔子庚午應天巡撫陳軾獻白兔夏
四月甲戌聶賢爲刑部尚書戊子南京兵部尚書王
廷相爲左都御史秋七月免順天永平及鳳陽淮安
揚州徐滁和災稅冬十月丙子下建昌侯張延齡于
獄削昌國公張鶴齡爵庚辰大同兵亂殺總兵官李
瑾代王奔宣府十一月己亥朔賑遼東旱災癸卯度
道士一萬人甲辰賑太原潞安災壬子賑延綏災癸
丑翟鑾憂去十二月己卯寇犯寧夏總兵官王効梁

震擊敗之

十三年春正月癸卯廢皇后張氏壬子立德嬪方氏
爲皇后二月寇犯延綏副總兵梁震擊敗之三月壬
申命禮部左侍郎黃綰撫賑大同乙酉寇犯響水堡
總制尚書唐龍遣將擊敗之夏四月己酉方獻夫致
仕五月丙戌免衛輝彰德懷慶泉州災賦秋七月癸
未免慶陽諸府災賦仍命所司賑之丙戌作延祺宮
八月壬子寇犯花馬池梁震禦却之辛酉許讚歸養
九月丙寅作九五齋恭默室己巳召梁材爲戶部尚
書冬十月辛酉召真人邵元節

十四年春正月壬申革督理倉場中官丙戌莊肅皇后崩二月己亥始作九廟三月甲戌作毓德景仁二宮乙亥王憲致仕甲申提督兩廣軍務兵部左侍郎張瓚爲兵部尚書戊子葬毅皇后己丑遼東軍亂執都御史呂經夏四月壬辰策試天下貢士賜韓應龍等三百二十五人進士及第出身有差甲午張孚敬病免復召費宏入閣丙午廣寧軍亂六月癸卯作綬室癸丑作啓祥宮是月寇犯大同總兵官魯綱禦却之秋七月甲戌賑吉安諸府饑己卯聶賢致仕戊子唐龍爲刑部尚書改秦金南京兵部八月乙巳詔九

卿會推各巡撫官著爲令辛亥工部左侍郎林廷楫
爲尚書九月己未朔汪鉉罷庚申作西海神祠甲申
免大同渾源災賦冬十月戊申費宏卒十一月乙亥
延津縣民李拱宸以其女獻納之是月免順天真定
霸及延安諸府災賦十二月癸己選民間女子八十
人入宮是月免濟南肇慶梧州諸府災賦

十五年春二月癸己賑湖廣災三月丙子奉章聖皇
太后如天壽山謁陵免昌平今年稅糧三之二賜高
年粟帛癸未至自天壽山夏四月甲午起許讚爲吏
部尚書癸卯發京師詣七陵祭告癸丑至自天壽山

是月寇犯涼州總兵官姜輿等擊敗之五月丁巳免
順天永平災賦乙丑毀禁中金銀佛像燔佛骨佛牙
于市六月戊子作清虛殿秋七月己卯免大同諸府
災賦九月庚午詣天壽山丁丑至自天壽山是秋寇
犯延綏官軍四戰皆敗之冬十月己亥更定世廟爲
獻皇帝廟戊申詣天壽山壬子至自天壽山十一月
甲寅寇犯大同掠山西戊午以皇子生詔赦天下十
二月九廟成閏十二月甲寅加上昭聖皇太后徽號
戊午加上章聖皇太后徽號癸亥赦天下禮部尚書
夏言兼武英殿大學士入閣預機務丙寅親享九廟

甲戌加真人邵元節禮部尚書乙亥禮部尚書掌詹
事府嚴嵩回部管事是冬免保定諸府及山東山西
河南江西湖廣災賦

十六年春正月戊子徽王厚熜進白兔二月癸酉奉
章聖皇太后如天壽山是月寇犯大同總兵官梁震
擊敗之三月甲申至自天壽山壬寅寇犯甘州丙午
幸大峪山視壽陵丁未駐沙河作行宮夏四月癸丑
至自大峪山六月甲寅林廷梲罷癸酉寇犯宣府殺
指揮趙鏜甲戌吏部左侍郎溫仁和爲工部尚書丙
子養心殿成秋九月甲戌寇犯大同是秋免順天寧

國武昌兗州南昌福州泉州肇慶韶州災賦冬十月
己未崇德殿成十一月丁亥張鶴齡下獄瘦死十二
月癸亥賑順天永平災

十七年春二月戊辰詣天壽山壬申至自天壽山三
月辛巳巡按福建御史李元陽進甘露戊子策試天
下貢士賜茅瓚等三百二十三人進士及第出身有
差己亥梁材罷以總督倉場戶部尚書李廷相代之
辛丑命咸寧侯仇鸞掛征彝副將軍印充總兵官改
督工尚書毛伯溫兵部尚書兼右都御史叅贊軍事
征安南莫登庸夏四月庚戌詣天壽山甲寅至自天

壽山戊午罷安南師癸亥賑京師饑卒未寇犯大同
叅將張世忠禦却之壬申唐龍歸養五月丙子督工
工部尚書楊志學爲刑部尚書六月丙辰定明堂大
饗禮下戶部侍郎唐胄于獄秋七月戊寅免濟南東
昌兗州災稅辛卯命河南雲南開礦採銀癸巳慈寧
宮成八月甲辰寇犯河西總督尚書劉天和遣將禦
却之丙辰禮部尚書掌詹事府顧鼎臣兼文淵閣大
學士入閣預機務以溫仁而代之九月癸酉南京工
部尚書蔣瑶爲工部尚書戊寅免畿內災糧辛巳加
上成祖睿宗廟號遂奉睿宗神主祔于太廟辛卯大

享上帝于元極寶殿奉睿宗配乙未幸大峪山丁酉
至自大峪山冬十一月辛未朔詣南郊上皇天上帝
號還詣太廟上太祖高皇帝高皇后尊號癸未賑甘
州諸衛饑乙未免江西災賦十二月癸卯章聖皇太
后崩壬子幸大峪山相視山陵甲寅至自大峪山乙
卯李時卒

十八年春二月庚子朔立皇子載璽爲皇太子封載
璽爲裕王載圳景王辛丑赦天下起黃綰爲禮部尚
書宣諭安南壬寅將南幸承天起翟鑒爲兵部尚書
兼右都御史充行邊使兵部尚書毛伯溫總督宣大

山西三關侍郎樊繼祖提督薊州山海共飭邊備甲辰作大明天子等十一寶丁未祈穀于元極寶殿輟配享壬子賑遼東饑癸丑安南莫方瀛敕鎮南關請降乙卯發京師命皇太子監國辛酉次真定望于北嶽丁卯次衛輝是夕行宮火三月己巳朔渡河祭大河之神辛未次鈞州望于中嶽甲戌免順天永平保定河間災賦庚辰至承天辛巳謁顯陵甲申享上帝于龍飛殿奉睿宗配秩于國社國稷徧羣祀丙戌以方士陶典真爲神霄保國宣敷高士戊子以大享禮成御龍飛殿受賀詔赦天下給復承天三年免明年

湖廣田賦五之一畿輔河南三之一夏四月壬子至
自承天庚申詔毛伯溫樊繼祖還京壬戌免湖廣災
賦甲子幸大峪山丙寅至自大峪山五月戊辰朔李
廷相罷己巳奪夏言官罷歸尋諭留之丙子召梁材
爲戶部尚書己卯寇犯遼東甲申奉獻皇后梓宮如
承天六月甲辰楊志學罷丁未永城獻瑞麥丙辰右
都御史周期雍爲刑部尚書是月寇犯薊州秋閏七
月庚申葬獻皇后于顯陵辛酉黃綰罷復命仇鸞毛
伯溫征安南是月寇犯宣府八月寇犯榆林總兵官
周尚大擊敗之九月己酉封陶典眞爲眞人辛酉詣

天壽山命戶部右侍郎王杲賑河南饑是秋免兩畿
浙江山東陝西湖廣災賦冬十月丙寅至自天壽山
十一月免山西江西災賦十二月乙亥免浙江災賦
十九年春正月丙午翟鑾爲禮部尚書兼武英殿大
學士入閣預機務辛亥寇入大同二月己卯罷武科
三月戊戌寇犯延綏夏五月乙卯作雷壇戊午蔣瑤
致仕六月丁卯戶部左侍郎張潤爲工部尚書梁材
罷甲戌改南京工部尚書李如圭爲戶部尚書辛己
瓦剌卜陸王桶李力款塞秋七月癸卯寇入萬全右
衛總兵官白爵逆戰于宣平敗之壬子戰于桑乾河

又大敗之癸丑授方士段朝用爲紫府宣忠高士
寅以朝用所化銀器薦食九廟戊午賑江西水災甲
戌寇入平涼遂及岢嵐石州八月丁丑周期雍罷逮
太僕卿楊最杖死九月癸卯改南京戶部尚書錢如
京爲刑部尚書己酉召仇鸞還以鎮守兩廣總兵官
柳珣代之是月寇犯固原周尚文戰于黑水苑敗之
延綏總兵官任傑追擊于鐵柱泉又敗之冬十月庚
申罷礦場辛酉免保定濟南諸府災糧甲子顧鼎臣
卒十一月甲午免蓬達南充諸州縣災賦壬子加真
人陶典真少保禮部尚書封其妻爲一品夫人丙辰

作慈慶宮

二十年春正月丙午海西卜兒孩款塞是月免蘇州
松江廬州鳳陽淮安揚州及滁和徐災糧二月乙丑
顯陵成給復承天三年丙寅下御史楊爵于錦衣獄
是月寇犯甘肅三月辛丑策試天下貢士賜沈坤等
二百九十八人進士及第出身有差壬寅寇犯鎮朔
堡己酉張潤以憂去督工尚書甘爲霖回部管事夏
四月己未莫登庸納款詔改安南國爲安南都統使
司以登庸爲都統使辛酉九廟災燬成祖仁宗主甲
戌許讚罷丙子赦天下壬午杖戶部主事周天佐等

廷下獄死五月丙戌朔賑保定饑戊子命工部左侍郎潘鑑左副都御史戴金等採木于湖廣四川壬辰寇犯開原甲寅賑遼東饑六月庚申賑順天永平饑戊辰寇犯太康堡壬申賑山西饑秋七月免河南陝西山東災賦八月辛酉昭聖皇太后崩甲子寇犯寧武關庚辰夏言罷辛巳錢如京致仕是月寇犯太原又犯大同宣府九月丙戌刑部左侍郎吳山爲尚書乙未王廷相革職戊戌翊國公郭勛有罪下獄己亥召南京戶部尚書劉天和爲兵部尚書提督團營辛亥寇犯山西入石州冬十月癸丑以山西被寇復徭

役二年仍發帑銀賑之丁卯命夏言復入閣召許讚
爲吏部尚書十一月辛卯葬敬皇后丙申免四川災
賦

二十一年夏四月庚申大高元殿成丙子賑順天永
平饑閏五月戊辰俺答阿不孩遣使求貢大同巡撫
龍大有誘殺之六月辛卯俺答大舉入寇駐朔州壬
寅掠廣武遂攻太原癸卯免西安諸府災賦秋七月
己酉朔夏言革職己未俺答寇潞安八月辛巳詔有
自負忠勇願赴軍前立功者各撫臣以聞壬午賑山
西被兵者癸巳嚴嵩兼武英殿大學士入閣預機務

丙申免順天永阜災賦辛丑李如圭劉天和罷九月
癸亥作佑國康陵雷殿己巳總督漕運右都御史王
杲爲戶部尚書冬十月乙酉郭勛死于獄吳山削籍
丁酉磔端妃曹氏寧嬪王氏等于市庚子改南京吏
部尚書聞淵爲刑部尚書是月免真定開封平陽福
州諸府災賦丙午張瓚卒十一月壬申毛伯溫爲兵
部尚書提督團營十二月己卯改南京兵部尚書熊
浹爲兵部尚書兼右都御史掌都察院事是月寇犯
遼東

二十二年春二月乙亥朔召南京禮部尚書張璧爲

禮部尚書三月庚戌起樊繼祖爲工部尚書採木湖
廣丙寅作大享殿夏四月丙戌雷霆洪應殿成六月
壬午免鳳陽諸府災賦秋八月丙子泰安州獻瑞麥
詔擇日奏謝元極寶殿獻其麥于祖廟西苑復進瑞
穀是月寇犯延綏遊擊將軍張鵬擊却之總兵官吳
瑛等追擊又敗之九月逮巡按山東御史葉經杖殺
之是月賑應天諸府及安吉烏程水災冬十月乙亥
寇犯遼東己卯作大享神御殿是月免真定及開封
諸府災賦癸丑寇殺守備陳舜十一月壬戌定宗
廟同堂異室之制十二月乙酉免蘇州松江常州鎮

江災賦

明史卷十七

本紀十七

世宗下

二十三年春正月寇犯黃崖口二月復犯大水谷三月癸丑策試天下貢士賜秦鳴雷等三百十七人進士及第出身有差是月寇犯龍門所夏六月戊寅免鳳陽災賦秋七月寇犯大同總兵官周尚文迎戰于黑山敗之八月丁卯朔加陶仲文少傅兼少保壬申內苑生嘉禾雙穗雩壇生靈黍五出詔諭廷臣務崇道教甲午翟鑾削籍九月丁未許讚兼文淵閣大學士張璧兼東閣大學士並入閣預機務壬子賑湖廣

旱災丙辰熊浹爲吏部尚書禮部尚書掌詹事府費
案回部管事戊午復設武科是秋免畿輔浙江福建
及承天災賦冬十月戊辰總督漕運右都御史周用
爲左都御史免開封諸府災糧甲戌寇犯膳房堡遂
入萬全右衛戊寅掠蔚州游騎至于完縣壬午京師
戒嚴乙酉毛伯溫削籍逮總督宣大兵部尚書翟鵬
巡撫薊鎮右僉都御史朱方下獄鵬謫戍方杖死甲
午右都御史掌大理寺戴金爲兵部尚書十一月庚
子京師解嚴加陶仲文少師癸丑免大同災糧十二
月逮總督宣大兵部左侍郎張漢下獄謫戍

二十四年春正月己酉楚世子英耀弑其父楚王驤
榕閨正月甲戌戴金罷丁丑南京吏部尚書唐龍爲
兵部尚書二月壬寅賑順天永平饑戊申詔流移復
業開墾閒田者給復十年三月丙寅賑保定順德廣
平饑夏五月戊子免濟南東昌兗州登州災賦六月
壬辰朔太廟成是月免畿輔山西陝西災賦秋七月
壬戌以宗廟禮成赦天下是月寇犯安塞保安八月
戊戌永和王知煥進白鹿詔告于祖廟己亥京山進
嘉禾丙午詔五城御史收瘞暴骸己酉張璧卒庚戌
寇犯遼東松子嶺殺守備張文瀚是月寇犯大同復

犯鵠鵠谷九月丁丑復召夏言入閣冬十月庚子免
大同災賦十一月辛巳許讚罷熊浹削籍癸未免宣
府災賦是月寇犯榆林十二月癸巳唐龍爲吏部尚
書甲辰兵部左侍郎路迎爲尚書

二十五年春二月己丑增築宣大邊牆三月甲子作
永禧仙宮庚辰賑應天諸府饑夏五月戊辰免順天
災稅俺答遣使款塞求貢復爲邊卒所殺辛未甘爲
霖罷癸酉賑延綏被寇者甲申南京右都御史王以
旂爲工部尚書六月癸巳路迎罷辛亥改禮部尚書
掌通政司陳經爲兵部尚書秋七月庚申唐龍削籍

甲子周用爲東都尚書丁卯免河南災稅乙亥南京
兵部尚書宋景爲左都御史是月俺答犯延安慶陽
總督侍郎曾銑遣兵擊走之八月免順天青州諸府
災糧九月己卯免淮安揚州鳳陽災賦是月寇犯寧
夏冬十月甲午殺故建昌侯張延齡十一月辛未延
津民李拱辰之子以其妹獻復納之十二月丁未賑
延安慶陽被寇者免開封歸德水災田租

二十六年春正月庚申宋景卒壬申周用卒庚辰聞
淵爲吏部尚書二月丁酉王以旂爲左都御史辛丑
詔選畿內女子三百人入宮甲辰南京刑部尚書屠

僑爲刑部尚書兵部左侍郎文明爲工部尚書三月
丙寅策試天下貢士賜李春芳等三百一人進士及
第出身有差夏四月丙戌逮巡撫山西右僉都御史
孫繼魯下獄尋瘐死己酉俺答復款塞求貢詔切責
拒之六月戊戌免淮安揚州鳳陽災稅秋七月壬申
度道士二萬四千人八月丙戌免鳳翔諸府災賦己
亥加陶仲文特進光祿大夫柱國兼支大學士俸甲
辰陳經罷九月丙辰王以旂爲兵部尚書戊辰王杲
下獄己巳南京戶部尚書夏邦謨爲戶部尚書屠僑
爲左都御史是月免徐宿蕭沛諸州縣及撫州承天

災賦閏九月戊子總督漕運右都御史俞茂堅爲刑
部尚書丙午免成都災賦冬十月免昌平良鄉諸州
縣及濟南東昌兗州災稅十一月乙未皇后崩十二
月辛酉逮甘肅總兵官仇鸞乙亥海寇犯寧波台州
二十七年春正月癸未逮曾銑下錦衣獄命王以旂
代之夏言罷總督倉場戶部尚書劉儲秀爲兵部尚
書疏辭削籍壬辰南京戶部尚書趙廷瑞爲兵部尚
書辛丑賑輦昌漢中饑是月寇犯廣寧殺叅將閻振
二月癸丑作永陵三月癸巳殺總督侍郎曾銑逮夏
言癸卯出仇鸞于獄夏五月丙戌葬孝烈皇后是月

寇犯宣府秋七月丙子免鳳陽災賦庚辰太清閣成
庚子西苑進嘉穀薦于太廟宣付史館羣臣表賀八
月丁巳重作圓明閣是月寇犯大同周尚文敗之九
月乙酉寇抱宣府是月免順天淮安西安大同諸府
災賦冬十月癸卯殺故大學士夏言丙辰寇犯隆慶
州十一月甲戌免濟南災賦乙未詔各撫按官採金
來獻十二月甲寅費家卒丁巳禮部尚書掌詹事府
孫承恩回部管事是冬免濟南平涼鳳翔漢中承天
諸府災賦

二十八年春正月甲午孫承恩罷二月乙巳賑臨洮

輦昌饑辛亥南京吏部尚書張治爲禮部尚書兼文淵閣大學士國子監祭酒李本爲少詹事兼翰林院學士並入閣預機務壬子寇犯宣府滴水崖乙卯吏部左侍郎兼翰林院學士掌院事徐階爲禮部尚書周尚文敗寇于曹莊丙辰宣府總兵官趙國忠又敗之于大滹沱三月乙酉皇太子冠丁亥薨夏四月辛亥趙廷瑞罷丙辰兵部左侍郎范鋹爲尚書疏辭削籍是月寇犯鎮羌永昌五月甲戌總督宣大兵部尚書翁萬達回部管事六月丁未免隆慶永寧被寇者秋糧仍發銀賑之己未免鳳陽諸府災賦秋七月庚

寅免陝洛諸州縣災稅是月浙江海賊起八月壬寅
西苑生瑞穀薦于太廟乙卯寇犯大同戊午免西安
諸府災稅九月戊辰寇犯榆林戊寅聞淵致仕己卯
諭茂堅致仕庚辰免嘉興湖州災糧壬午寇犯大同
癸巳夏邦謨爲吏部尚書是月寇犯遼東入沙河堡
冬十月乙巳南京刑部尚書劉訥爲刑部尚書辛亥
吏部左侍郎潘潢爲戶部尚書癸亥吏部左侍郎丁
汝夔爲兵部尚書是月免順天青州諸府災糧十一
月甲申祔孝烈皇后于太廟祧仁宗庚寅文明卒是
月免大同及瀋陽諸州災糧十二月丁未提督倉場

戶部左侍郎李士翱爲工部尚書

二十九年春三月己卯策試天下貢士賜唐汝楫等

三百二十人進士及第出身有差夏四月辛亥劉訥

罷五月乙亥李士翱爲刑部尚書己卯戶部左侍郎

胡松爲工部尚書六月戊午寇犯大同殺總兵官張

達副總兵林椿是月免廣平濟南諸府災稅閏六月

癸酉逮總督宣大兵部右侍郎郭宗臯巡撫大同右

副都御史陳燿下獄宗臯謫戍燿杖死免順天淮安

平陽開封諸府災稅秋七月辛丑調潘潢于南京以

李士翱代之己酉南京兵部右侍郎顧應祥爲刑部

尚書已未免西安諸府災稅八月壬戌朔俺答大舉
入寇丙寅封陶仲文爲恭誠伯方士郭弘經王永寧
爲真人丁丑俺答兵攻古北口薊鎮兵潰戊寅掠通
州京師戒嚴召大同總兵官仇鸞及諸路兵入援壬
午俺答兵薄都城以仇鸞爲平虜大將軍節制諸路
兵馬命左諭德趙貞吉宣諭諸軍癸未帝御奉天殿
宣示百官自十八年帝不視朝至是始一出甲申寇
退趨白羊口逮駐防通州右副都御史王儀乙酉逮
巡撫薊鎮右副都御史王汝考總兵官羅希韓丙戌
京師解嚴杖趙貞吉于廷丁亥殺兵部尚書丁汝夢

巡撫保定兵部右侍郎楊守謙杖左都御史屠僑刑部右侍郎彭黯大理寺卿沈良才刑科給事中杜侃等于廷仇鸞率師逐寇敗績九月辛卯朔賑薊昌平密雲通被寇者乙未更定京營之制廢十二團營併于三大營以仇鸞總督之罷中官領營務戊申免畿內災賦壬子廢鄭王厚烷爲庶人錮之高牆丁巳李士翱罷起復翁萬達爲兵部尚書冬十月癸亥戶部左侍郎孫應奎爲尚書壬申免順天鳳陽彰德諸府災賦甲戌張治卒十一月癸巳分遣御史魏謙吉等選各邊軍入衛己亥罷翁萬達兵部侍郎王邦瑞爲

尚書免金華衢州台州溫州災糧辛亥免重慶災賦
三十年春正月庚戌免大同災賦二月乙亥胡松罷
王邦瑞削籍辛巳協理戎政兵部右侍郎趙錦爲兵
部尚書丙戌夏邦謨罷改顧應祥于南京三月辛卯
吏部左侍郎李默爲尚書南京右都御史歐陽必進
爲工部尚書壬辰命兵部左侍郎史道兼右僉都御
史經畧馬市丙申南京禮部尚書萬鎰爲刑部尚書
丁未免昌平順義懷柔密雲去年被寇者秋糧夏四
月辛未左副都御史商大節下獄論死庚辰賑保定
諸府旱災丙戌設馬市于大同鎮羗堡五月庚戌又

設馬市于宣府新開堡秋七月庚寅免延安災賦九月免應天及開封承天九江諸府災賦冬十月壬申李默削籍丙子萬鎰爲吏部尚書是月免畿輔山東山西及銅仁思恩災賦十一月丁亥吏部左侍郎應大猷爲刑部尚書

三十一年春正月丁亥寇犯大同壬辰掠威遠城甲午東安大水給復一年寇犯弘賜堡辛丑又犯大同二月癸丑朔賑宣大饑丁巳寇又犯大同辛酉犯威虜堡殺指揮王恭關內震恐己巳建內府營三月戊子詔大將軍仇鸞赴大同勦寇辛卯禮部尚書徐階

兼東閣大學士入閣預機務乙未召致仕禮部左侍郎歐陽德爲尚書夏四月丙寅寇犯遼東殺指揮王相丙子倭犯浙江五月甲申調孫應奎于南京工部召仇鸞還京丙午寇犯紅城堡六月己未免鳳陽淮安災稅丙子戶部左侍郎方鈍爲尚書秋七月癸未開軍民納馬事例丙申免西安延安鳳翔平涼災稅壬寅以倭警設浙江巡撫命右僉都御史王忬爲之兼轄福建濱海諸府八月甲寅廬江王祐棹獻瑞穀詔獻于太廟羣臣表賀戊午收仇鸞大將軍印壬戌鸞死作乾光殿丙寅寇犯大同乙亥戮仇鸞屍于市

籍其家戊寅免東昌兗州災糧是月寇犯大同分掠朔應山陰馬邑諸州縣九月乙酉寇犯山西三關壬辰犯寧夏丙申應大猷罷庚子杖協理戎政兵部右侍郎蔣應奎左通政唐國卿于廷癸卯罷各邊馬市乙巳刑部右侍郎何鼐爲尚書戊申寇犯神池堡是月免順天平陽及開封諸府災賦冬十月己未趙錦戍邊召翁萬達代之未至卒己巳寇犯遼東是月免大名南昌諸府災賦十二月己酉朔選幼女三百人入宮丁巳下光祿寺少卿馬從謙于錦衣獄杖殺之三十二年春正月戊寅朔遣刑部左侍郎吳鴻胥准

徐水災庚辰杖都給事中楊思忠于廷黜爲民癸卯
協理戎政兵部左侍郎聶豹爲兵部尚書二月丁巳
羅田縣獻白兔丙寅倭犯溫州辛未賑大同饑壬申
寇犯宣府三月丁丑朔陝西大饑賑之辛巳寇犯延
綏壬午命兵部右侍郎楊博巡邊甲申賑山東饑辛
卯策試天下貢士賜陳謹等四百三人進士及第出
身有差甲辰寇犯宣府閏三月乙丑大道殿成築京
師外城夏四月己亥作宜春宮五月壬戌寇犯遼東
倭自閏三月入寇至于六月乃去濱海諸府咸被其
毒秋七月丁巳俺答大舉入寇乙丑寇犯延綏己巳

俺答寇挿前浮圖等峪關南大震卒未遊擊陳鳳朱
玉與寇戰于三家村壬申寇退是月河南賊師尚詔
作亂陷歸德府及柘城鹿邑諸縣八月乙亥朔寇犯
蔚州丙子小王子寇宣府己卯萬鎗削籍召李默爲
吏部尚書戊戌免濟南青州東昌兗州災賦是月師
尚詔攻太康敗官軍九月丙午寇犯山西殺總兵官
李淩辛酉以寇退告謝郊廟社稷是月免南畿河南
及大同災賦師尚詔掠宿州官軍追敗之五河冬十
月甲戌朔賑河南山東饑丁酉師尚詔被擒盜平辛
丑京師外城成是月免畿輔浙江災糧十一月甲寅

立御製碑文于太和山

三十三年春正月壬寅朔杖給事中張思靜等于廷
二月庚辰倭犯松江三月癸亥歐陽德卒丁卯吏部
左侍郎王用賓爲禮部尚書夏四月甲戌賑畿內饑
乙亥倭犯海鹽及嘉興乙酉陷崇明癸巳寇犯宣府
五月壬寅倭掠蘇州丙午山西和順縣民獻瑞兔丁
未倭入崇德大掠而去丁巳以倭寇猖獗命南京兵
部尚書張經總督南畿及浙江山東兩廣福建軍務
討之六月癸酉寇犯大同殺總兵官岳懋甲申倭犯
嘉興己丑遣刑部右侍郎陳儒賑大同軍士秋七月

戊申西苑生嘉禾盟津王子祐摺獻瑞穀薦于太廟
八月乙未寇犯宣府九月甲寅南京右都御史吳鵬
爲工部尚書己未寇犯山西乙丑犯潮河川丁卯掠
古北口是秋免保定及山東湖廣災賦冬十月庚午
寇犯薊州總督楊博禦却之壬申逮巡撫應天兵部
左侍郎屠大山十一月乙己免大同災賦

三十四年春正月丁酉朔倭犯崇德德清戊戌都督
同知萬表敗倭于蘇州戊申屠僑卒庚申南京兵部
尚書周延爲左都御史甲子賑華亭上海嘉定崇明
災二月戊寅寇犯宣府丙戌遣工部右侍郎趙文華

察視江南賊情甲午犇豹罷是月寇犯薊鎮三月丙申朔總督薊遼保定右都御史楊博爲兵部尚書甲寅蘇松兵備副使任環敗倭于南沙夏四月乙亥倭寇江北戊子倭掠常熟江陰任環擊敗之是月寇犯宣府執叅將李光啓等殺之五月甲午朔張經遣叅將盧鏜等擊倭于王江涇大破之乙巳倭犯蘇州己酉逮張經下獄以兵部右侍郎周琬代之乙卯任環敗倭于陸涇六月庚辰又敗之于馬蹟山壬午周琬罷以兵部右侍郎楊宜代之秋七月乙巳倭陷南陵丙辰遂犯南京殺指揮朱裏八月己丑免西安諸府

災賦壬辰蘇松巡撫曹邦輔敗倭于澣墅九月乙未
趙文華及巡按御史胡宗憲擊倭于陶宅敗績戊戌
選畿內女子一百六十人入宮丙午寇犯大同宣府
辛酉又犯保安叅將馬芳擊敗之是月免鳳陽濟南
諸府災糧冬十月丙子免太原諸府災賦庚寅殺總
督尚書張經巡撫浙江都御史李天寵兵部員外郎
楊繼盛辛卯倭掠寧波犯會稽十一月辛亥選承天
女子二十人入宮庚申倭犯興化泉州閏十一月丁
丑免順天保定河間大名災賦十二月甲午遣官採
山東四川礦銀壬寅山西陝西河南地大震壞城郭

廬舍河渭溢死者八十三萬餘人乙巳詔趙文華還京丁未作紫皇殿寇犯神木

三十五年春正月乙亥楊博憂去召總督宣大兵部尚書許論代之壬午倭敗官軍于松江是月寇犯莊浪二月庚寅朔命戶部左侍郎鄒守愚祭告山西河南陝西山川賑恤災民甲午以平陽延安地震尤甚發銀賑之仍免其稅糧己亥楊宜罷以兵部右侍郎王誥代之戊午下李默于錦衣獄論死王誥罷以兵部左侍郎胡宗憲代之三月辛未吳鵬爲吏部尚書甲戌策試天下貢士賜諸太綬等三百三人進士及

第出身有差癸未趙文華爲工部尙書夏四月己丑朔改王用賓于南京吏部甲午吏部左侍郎吳山爲禮部尙書辛亥遊擊宗禮擊倭于崇德軍潰死之五月乙丑趙文華提督浙江江南軍務丁亥遣左通政王槐採礦銀于玉珏峪六月庚寅作帝眞殿丙申總兵官俞大猷敗倭于黃浦辛丑寇犯宣府殺遊擊張紘甲辰遣戶部主事沈應乾採礦銀于河南秋七月辛未西苑進瑞穀詔獻于太廟羣臣表賀辛巳胡宗憲大破倭于乍浦八月壬寅詔有司採芝辛亥官軍襲破徐海于梁莊倭寇悉平九月壬戌寇犯遼東甲

戌以倭寇平祭告郊廟社稷召趙文華還理部事是
月免兩畿及江西福建災賦冬十月戊子寇犯大同
紅門堡十一月戊午寇犯廣寧殺總兵官殷尚質己
未詔免嚴嵩廷賀賜肩輿入直辛己寇犯一片石總
兵官歐陽安禦却之十二月己亥何鼐罷丙午歐陽
必進爲刑部尚書丁未寇犯環慶

三十六年春正月丁卯以倭警設福建巡撫命右僉
都御史阮鶚爲之二月寇犯大同三月犯永平殺副
總兵薄承勛犯延綏殺副總兵陳鳳夏四月丙申奉
天華蓋謹身三殿及奉天門午門並災五月癸亥命

工部右侍郎劉伯躍總督川湖採朱張舜臣提督大
石窩採石辛未倭犯天長六月壬午朔寇犯宣府甲
午停陝西採礦秋七月庚午詔順天及廣東採辦珍
珠一百三十萬顆八月辛丑趙文華罷尋黜爲民歐
陽必進爲工部尚書丁未作午門南京戶部尚書賈
應春爲刑部尚書是月寇犯義州九月癸丑禮部彙
進瑞芝千本是月免徐蕭及蒲絳諸州縣災賦寇犯
大同及應朔冬十月丙戌詔禮部採芝于五嶽名山
丁酉免順天諸府災糧十一月庚戌朔免山東災賦
庚午作大光明殿丁丑辛愛寇大同圍右衛城十二

月癸未免寧波紹興溫州台州處州災賦是月寇入遼陽

三十七年春正月庚申鄆縣民王金獻芝山癸亥罷河南採礦二月丙午巡撫四川都御史黃光昇進芝四十九本三月丙辰方鈍許論罷賈應春爲戶部尚書起復楊博爲兵部尚書逮總督宣大兵部右侍郎楊順甲子協理戎政兵部右侍郎鄭曉爲刑部尚書逮巡撫福建右副都御史阮鶚辛未寇犯永寧州夏四月癸未遼東大饑賑之丁亥胡宗憲獻白鹿告廟受賀是月倭復寇浙江福建五月己酉免渾源諸州

災賦辛酉賑灤饑六月癸未以大同被寇免其稅糧
發銀賑之丙戌倭犯樂清永嘉癸卯作壽明殿秋閏
七月庚辰西苑進瑞穀獻廟受賀癸巳胡宗憲復獻
白鹿八月己未寇犯永昌涼州圍甘州己巳寇犯宣
府冬十月癸丑禮部彙進瑞芝一千八百六十本詔
令廣求徑尺以上者十一月免廬州承天太原諸府
災賦十二月甲子築大同邊牆

三十八年春二月庚午寇犯潘家口渡灤河逼三屯
營三月己卯寇自遵化東掠遷安西掠薊州玉田五
日乃出丁亥策試天下貢士賜丁士美等三百三人

進士及第出身有差甲午逮浙江總兵官俞大猷夏
四月丁未倭犯通州甲寅倭犯福州丁巳海道副使
劉景韶敗倭于如皋庚申巡撫鳳陽李遂敗倭于姚
家蕩丙寅劉景韶大破倭于印莊五月辛巳逮總督
薊遼右都御史王忬下獄論死甲午劉景韶破倭于
廟灣江北倭寇悉平六月乙巳寇犯大同甲寅賈應
春罷南京戶部尚書馬坤爲戶部尚書秋八月辛亥
李遂獻白兔告于太廟己未李遂胡宗憲合擊倭于
劉家莊大敗之甲子賑遼東饑是月寇犯土木九月
乙亥免中年蒲川虞城災賦是月寇犯宣府冬十月

甲子太元都殿成是月免順天蘇州杭州興化諸府
災賦十二月癸丑免曹單金鄉魚臺災賦乙丑開天
津海道輸粟于遼東

三十九年春正月丙戌寇犯宣府二月丁未封道士
陳善道爲真人丁巳南京振武營兵亂殺總督糧儲
侍郎黃懋官己未賑順天永平饑三月乙亥馬坤罷
丙子命左副都御史鄢懋卿清理天下鹽法己卯兵
部左侍郎江東爲戶部尚書癸未詔求天下五色芝
盈尺者大同總兵官劉漢襲兀慎于灰河敗之乙酉
分遣御史修舉九邊屯政丁亥寇犯遼東陷廣寧中

前所城戊子寇犯一片石等關夏四月己亥改江東
于南京兵部甲辰戶部左侍郎高耀爲尚書甲寅鄭
曉罷五月壬午兵部左侍郎閔煦爲刑部尚書賑山
西三關饑秋七月乙丑朔寇犯薊西遊擊將軍胡鎮
禦却之庚午劉漢襲寇于豐州破之八月戊戌胡宗
憲獻瑞芝白龜詔賜龜名曰玉龜芝曰仙芝告于太
廟戊午南京工部尚書潘恩爲刑部尚書九月己巳
寇犯大同戊寅免潮州被寇者稅糧壬辰玉熙宮成
是月免順天濟南太原承天諸府災賦冬十月免保
定延安彰德諸府災賦十一月甲子逮南京總督糧

儲右副都御史章煥丙子免西安災賦丙戌神霄紫
府關範保國弘烈宣教振法真通忠孝秉一真人少
師恭誠伯陶仲文死十二月戊午巡撫陝西都御史
程軌獻白鹿瑞芝告太廟是月寇犯遼東海州

四十年春正月丙寅寇犯山西五花營二月辛卯朔
賑山東饑辛丑周延卒丁未景王之國壬子歐陽必
進爲左都御史癸丑賑順天永平保定河間饑三月
癸亥督工工部尚書雷禮回部管事辛未南京錦衣
衛指揮徐維勛獻白兔告廟受賀乙亥吳鵬吳山罷
吏部左侍郎袁煒爲禮部尚書丁丑作萬春宮戊寅

歐陽必進爲吏部尚書丁亥潘恩爲左都御史夏四月甲午吏部右侍郎馮天馭爲刑部尚書丁未賑山西饑五月乙亥李本憂去六月丙戌作仁和宮丁亥馮天馭罷秋七月癸巳南京刑部尚書蔡雲程爲刑部尚書己亥賑遼東饑庚戌寇犯宣府副總兵馬芳禦却之八月己未西苑進瑞穀告廟受賀九月庚子寇犯居庸關叅將胡鎮禦却之辛丑賑蘇州松江常州鎮江杭州嘉興湖州水災甲辰以陝西固原寧夏地震賑之壬子免保定諸府災賦冬十月辛未作壽光閣成癸未禮部奏四方所進莩七百六十九本請

申諭加意採取五色徑尺者從之淮王厚燾獻白鴈
告廟受賀十一月甲午袁煒爲戶部尚書兼武英殿
大學士入閣預機務庚子歐陽必進罷禮部尚書掌
詹事府郭朴爲吏部尚書庚戌寇犯寧夏辛亥萬壽
宮災十二月丙寅寇犯遼東蓋州庚午免承天諸府
災賦己卯作萬壽宮

四十一年春正月丙申吏部左侍郎嚴訥爲禮部尚
書丙午免淮安及崇仁諸縣災賦二月庚辰大學士
嚴嵩孫鵠獻白兔瑞芝方士藍道行獻白龜告廟受
賀三月辛卯白兔生子詔謝元告廟羣臣表賀己亥

策試天下貢士賜徐時行等二百九十九人進士及第出身有差己酉萬壽宮成夏四月癸酉鄆縣民王金進靈芝五色龜告廟受賀甲戌白兔復生子詔謝元告廟五月戊子吏部右侍郎張永明爲刑部尚書庚寅寇犯遼東副總兵黑春等敗之壬寅嚴嵩有罪免壬子寇犯遼東六月甲寅詔廣東福建撫按官購龍涎香丙辰白兔復生子告廟受賀秋七月戊戌白兔復生子庚子西苑獻瑞穀並告廟受賀八月丁巳高燿獻龍涎香九月壬午朔三殿成改奉天殿曰皇極華蓋曰中極謹身曰建極癸巳潘恩罷庚子免開

封災稅丙午方士熊顯進法書賜官帶銀幣己酉張
永明爲左都御史冬十月丁巳南京戶部尚書黃光
昇爲刑部尚書是月免廬州鳳陽淮安揚州及南昌
諸府災糧十一月乙酉遣御史姜儆王大任分行天
下訪求方士法書丁亥逮總督江南浙江江西福建
兵部尚書胡宗憲旣而釋之己丑免福建被寇者稅
糧辛丑寇犯寧夏副總兵王勲戰死己酉倭陷興化
是月免西安武昌諸府災賦十二月辛酉甘露降于
顯陵告廟受賀

四十二年春正月丁酉甘露復降于顯陵遣使祭告

丁未延綏總兵官趙岢出塞襲莽貫部于菽麥湖敗
之戊申寇犯宣府二月癸酉寇犯遼陽副總兵楊照
禦却之丙子免湖廣麻陽諸縣災賦丁丑命張臬兼
督福建軍務討倭賊三月甲午嚴訥爲吏部尚書吏
部左侍郎李春芳爲禮部尚書夏四月辛亥西苑白
兔復生子百官賀戊午遼東金復蓋三衛饑賑之庚
申倭犯長樂總兵官劉顯俞大猷合兵殲之丁卯副
總兵戚繼光擊倭于平海衛破之秋七月庚午方士
趙添壽獻符法授官遣之己丑西苑龜生卯八月壬
子西苑獻嘉禾並告廟受賀九月甲辰免徐沛豐碭

災賦冬十月下卯辛愛把都大舉入寇京師戒嚴詔諸路兵入援戊辰寇掠順義三河殺總兵官孫臚遊擊將軍趙溱乙亥大同總兵官姜應熊禦寇于密雲敗之十一月丁丑京師解嚴甲午壽恩宮成癸卯詔選女子三百人入宮十二月己酉禁通海遼船壬申寇犯沙河鋪

四十三年春正月壬辰土蠻黑石炭寇薊鎮總兵官胡鎮叅將白文智禦却之二月甲辰朔雲南進寶石詔更採青紅色二寸黃色徑寸者以獻戊午倭犯仙遊總兵官戚繼光敗之福建倭寇悉平閏二月戊寅

免南昌瑞州九江災賦己卯寇犯遼東三月壬子扶
溝縣民盧欽以其女孫獻納之丙辰元熙延年殿成
夏四月乙亥免順天諸府災賦五月壬寅朔廣東進
珠二千兩命別選大珠及香木以獻乙卯有桃見于
御幄丙辰鹿兔生子告廟受賀己巳作洪應壇太素
殿六月癸酉魯迷國貢獅子辛卯倭犯海豐俞大猷
湯克寬大破之秋七月丙辰雲南進寶石命更採徑
寸者以獻八月乙亥御醫王金獻萬壽芝山冬十月
寇犯陝西十二月寇兩犯山西殺遊擊將軍梁平守
備祁謀是歲天下臣民進法秘仙桃瑞芝及爲朝廷

建醮祝釐者甚衆各賞賚有差

四十四年春正月己未老嫗進舞象三月壬子策試天下貢士賜范應期等三百九十四人進士及第出身有差己未袁煒病免辛酉嚴世蕃羅龍文伏誅是月寇犯遼東殺都指揮線補袞楊維藩夏四月癸酉作清馥殿庚辰命嚴訥李春芳並兼武英殿大學士入閣預機務起復郭朴爲吏部尚書工部尚書董份爲禮部尚書壬午寇犯肅州總兵官劉承業戰却之甲午倭犯福寧總兵官戚繼光敗之五月丙申朔作雷軒甲辰寇犯鎮武堡辛酉寇犯延綏六月甲戌芝

生睿宗廟柱告廟受賀詔于其地建玉芝宮戊寅董
份削籍戊子吏部左侍郎掌詹事府高拱爲禮部尚
書是月寇犯宣大秋八月辛未以西苑進嘉禾陽曲
獻白鹿告廟受賀壬午有藥見于御座告謝太極殿
丙戌作萬法寶殿辛卯作毓德宮是月寇犯宣府九
月戊戌寇犯延綏己亥作樂成殿庚戌定玉芝宮時
享儀乙卯作延禧殿冬十月乙丑交城王表柙獻白
鹿告廟受賀是月免高淳及山東災賦十一月癸卯
嚴訥病免戊申奉安睿宗獻皇帝慈孝獻皇后神位
于玉芝宮十二月己卯作真慶大元都殿

四十五年春二月癸亥朔下戶部主事海瑞于錦衣
獄庚寅作御懋殿三月癸巳寇犯宣府己未郭朴兼
武英殿大學士高拱兼文淵閣大學士並入閣預機
務夏四月丙寅南京兵部尚書胡松爲吏部尚書吏
部左侍郎掌翰林院高儀爲禮部尚書甲戌作紫極
殿壽清宮丙戌寇犯遼東六月丁卯太醫院吏目李
乾獻白兔告廟受賀秋七月乙未寇犯宣府癸丑永
和王新墮獻白鹿告廟受賀丙辰寇犯延綏戊午通
天津海道轉漕于永平八月丁丑西苑進瑞穀告廟
受賀戊寅作紫宸新宮乙酉寇犯延安九月丙申作

顯陵龍飛殿冬十月壬戌張永明罷丁卯寇犯固原
殺總兵官郭江等癸酉寇犯偏頭關丙子賑淮徐饑
庚辰南京禮部尚書王廷爲左都御史癸未楊博爲
吏部尚書閏十月己丑總督宣大兵部尚書趙炳然
回部管事壬辰寇犯延綏癸己免登州諸府災糧甲
辰寇犯大同殺叅將崔世榮十一月己未帝不豫十
二月庚子疾甚還大內崩于乾清宮年六十隆慶元
年正月上尊諡曰欽天履道英毅聖神宣文廣武洪
仁大孝肅皇帝三月葬永陵

論曰大禮一節集議諸臣誠過矣張桂一出先之以

繼統申之以明倫論辨衍衍持議近正未可以春秋
誅意之法而並廢其說也然而稱宗入廟又未如所
据何經帝曰如罔極何則不謂之私其所親不得矣
蓋帝資本英果銳于有爲釐定典章初政居然可紀
惜其燭理未真私欲間雜一入方士之說遂大惑不
解日見乖張刑賞失宜諸務叢脞迨至寇賊蠭起內
外交訐而猶靜攝玄元侈言祥瑞豈青壇紫府建醮
修齋果有裨于祝國佑民之大者哉帝之爲在秦皇
漢武之間矣傳曰無欲然後可以言王道殆于帝益
徵云